

Inatsisartut suleriaasianni § 37 naapertorlugu matumuuna apeqquteqaatinik imaattunik Naalakkersuisunut saqqummiussivunga:

**Apeqqutit:**

1. **Utoqqaat namminneq illumik pisiaminnik ukiorpassuarni akilersorsimasaminnik aserfallatsaaliuineq eqqarsaatigalugu qanoq Naalakkersuisunit pilersaaruteqarfigineqarpat?**
2. **Utoqqalinersiallit ukiorpassuarni illuminnut akilersuisimasut, taamaattoq utoqqalinersiaqalernerme nalaani suli akilersukkaminnik annertunngitsumik naammassinngitsuugaqalaarsimasut illuminni toqqissillutik sapilernissartik angutserlugu najugaqaannarsinnaanissaat qulakkeerumallugu Naalakkersuisunit arlaatigut periusissamik peqarpat/pilersaaruteqarpat?**
  - a. **Uani pineqarput utoqqalinersiallit aappariit, aamma**
  - b. **Utoqqalinersiallit kisimiittunngorsimasut (aapparisaq qimagunneratigut)**
3. **Utoqqalinersiamit illuutinut akilersuutit pillugit iluarsasseqqittoqarnissaanik Naalakkersuisut arlaatigut anguniakkamik suliniuteqarpat?**
4. **Qanoq iliornikkut utoqqaat illuminnik akilersuutaat pillugit oqilisaasoqarsinnaava?**

(Inatsisartuni ilaasortaq Laura Táunâjik, Siumut)

**Tunngavilersuut:**

Utoqqaat namminneq illumik pisiaminnik akilersuisarnerat utoqqalinersiaqarnermi inuuniarnikkut artukkiisarpoq. Utoqqaat aappariit akilersuisarnerat ikioqatigiinnikkut pisarpoq, aapparisarli toqukkut qimagukkaangat akiligassaq tamakkiisoq aapparisaqamut tuttarpoq. Tamanna kisimiilluni imminut napatinniarnermut oqitsuinnaanngilaq. Utoqqaat akiligassatigut angummanniartarnerat sunut tamanut periarfissaarutsitsinermik misigititsisarpoq.

Tupinnanngitsumik nunatsinni utoqqalinersiaqalernerme qallunaat nunaannut nuuttartut ukiuni kingullerni amerliartorsimapput.

Nunarput utoqqarnut aamma orniginartuussappat tamakku tamaasa nipilersoqataapput, nunami suliffilinnut kisimi inuuffigissallugu aaqqissuunneqartusaanngilaq. Utoqqaq utoqqalisussaavoq ukiorpassuarni sulisimanerminut ernumassuteqarnani inuusariaqartoq.

Nalimmassaasoqartariaqarpoq ilutigisaanillu aaqqissuusseqqinnerit pitsanngorsarumallugit akiligassatigut iluarsasseqqittoqartariaqarpoq.

Kissaatigaara apeqqutima ullut qulit suliffiusut iluanni akineqarnissaat.